



SLUŽBENE NOVINE SREDNJOBOSANSKOG KANTONA

Broj 3

17. aprila 2020.
TRAVNIK

Godina: XXIV.

PREDSJEDAVALJUĆI SKUPŠTINE SREDNJOBOSANSKOG KANTONA

97

Na osnovu tačke j) stava 1. člana 32a. Ustava Srednjobosanskog kantona („Službene novine Srednjobosanskog kantona“, broj: 1/97, 5/97, 6/97, 2/98, 7/98 – ispravka teksta, 8/98, 10/2000, 8/03, 2/04 i 14/04), donosim

U K A Z O PROGLAŠENJU ZAKONA O TURISTIČKIM ZAJEDNICAMA SREDNJOBOSANSKOG KANTONA

I.

Prolašavam Zakon o turističkim zajednicama Srednjobosanskog kantona, koji je donijela Skupština Srednjobosanskog kantona na XI. sjednici održanoj 16. marta 2020. godine.

Broj: 01-02-200/20 PREDSJEDAVALJUĆI SKUPŠTINE
17. marta 2020.

Travnik

Josip Kvasina, s. r.



SKUPŠTINA SREDNJOBOSANSKOG KANTONA

98

Z A K O N O TURISTIČKIM ZAJEDNICAMA SREDNJOBOSANSKOG KANTONA

POGLAVLJE I. OSNOVNE ODREDBE

Član 1.

(Predmet Zakona)

Ovim zakonom uređuje se osnivanje i način rada turističkih zajednica te način njihove organizacije, finansiranja i privređivanja, kao i kriteriji kategorisanja turističkih mjesta.

Član 2.

(Gramatička terminologija)

Gramatička terminologija korištenja muškog i ženskog roda za pojmove u ovom zakonu podrazumijeva oba roda.

Član 3.

(Pravni status)

(1) Turistička zajednica je pravno lice. Prava i obaveze turističke zajednice utvrđuju se ovim zakonom, odlukom o osnivanju i statutom turističke zajednice.

(2) Svojstvo pravnoga lica turistička zajednica stječe danom upisa u sudski registar u nadležnom sudu.

(3) Prijavu za upis u Upisnik turističkih zajednica (u daljnjem tekstu: Upisnik), kao i sve upisane promjene dužno je podnijeti lice ovlašteno osnivačkim aktom, u roku od 15 dana.

(4) Upisnik vodi Ministarstvo privrede Srednjobosanskog kantona (u daljnjem tekstu: Ministarstvo).

(5) Oblik i sadržaj obrasca prijave za upis u Upisnik te sadržaj i način vođenja Upisnika propisati će ministar privrede (u daljnjem tekstu: ministar).

Član 4.

(Ciljevi osnivanja)

(1) Turistička zajednica se osniva radi razvoja, unapređenja i promicanja turizma na području lokalnih

zajednica, kao i Srednjobosanskog kantona (u daljnjem tekstu: Kanton) u cjelini, privrednih interesa pravnih i fizičkih lica koja pružaju ugostiteljske i druge turističke usluge ili obavljaju drugu djelatnost u neposrednoj vezi s turizmom, na način da upravlja destinacijom na nivou za koji je osnovana.

(2) Zajednički ciljevi osnivanja turističke zajednice su:

a) unapređivanje općih uslova boravka turista, posebno podizanje kvaliteta turističkih i drugih komplementarnih usluga, očuvanje i stvaranje prepoznatljivog i privlačnog turističkog ambijenta i osiguranje turističkoga gostoprimstva na području za koje je osnovana;

b) promocija turističkoga proizvoda područja za koje je osnovana, u skladu sa sistemom promicanja turizma te njegovim posebnim i općim zadacima, od nivoa općine / grada do nivoa Kantona;

c) razvijanje svijesti o važnosti, privrednim, društvenim i drugim efektima turizma te o potrebi i važnosti očuvanja i unapređenja svih elemenata turističkoga proizvoda određenoga područja, a posebno zaštite okoliša;

d) poticanje razvoja turističke infrastrukture i pružanja informacija turistima.

Član 5.

(Djelatnost turističke zajednice)

(1) Djelatnost turističke zajednice se zasniva na načelu ostvarivanja javnog interesa u oblasti turizma, čiji osnovni cilj nije ostvarivanje neposredne dobiti.

(2) Izuzetno od stava (1) ovoga člana, turistička zajednica može:

a) upravljati dobrima i resursima (izletištem, lovištem, parkom, plažom, jezerom, rijekom, prirodnim i kulturno-historijskim naslijeđem) koji su joj dati na upravljanje odlukom osnivača u skladu s posebnim propisima;

b) organizovati manifestacije i priredbe;

c) objavljivati turističke komercijalne oglase u oglasnim medijima koji su im odlukom osnivača dati na upravljanje;

d) prodavati suvenire, ulaznice, turističke karte i brošure, osim vlastitoga promotivnog materijala;

e) obavljati i druge poslove od javnog interesa koji su u funkciji razvoja turizma i koji nisu u suprotnosti s ovim zakonom i drugim propisima.

Član 6.

(Javnost rada)

(1) Rad turističke zajednice je javan.

(2) Javnost rada osigurava se i ostvaruje na način propisan statutom turističke zajednice.

Član 7.

(Sistem turističkih zajednica)

Turistička zajednica može se osnovati kao Turistička zajednica Srednjobosanskog kantona (u daljnjem tekstu: Turistička zajednica Kantona) ili kao turistička zajednica općine / grada.

Član 8.

(Članovi turističke zajednice)

(1) Turistička zajednica ima obavezne i počasne članove.

(2) Osim članova iz stava (1) ovoga člana, turistička zajednica može imati i dobrovoljne članove.

(3) Skupština turističke zajednice, na prijedlog turističkog vijeća, može imenovati počasnim članom turističke zajednice lice posebno zaslužno za razvoj i promicanje turizma.

(4) Počasni član turističke zajednice ne može birati niti biti biran u tijela turističke zajednice.

Član 9.

(Statut turističke zajednice)

(1) Prava i obaveze turističke zajednice utvrđuju se ovim zakonom i statutom turističke zajednice.

(2) Statutom turističke zajednice uređuje se:

a) naziv i sjedište turističke zajednice;

b) zadaci turističke zajednice;

c) prava, obaveze i odgovornosti članova turističke zajednice;

d) djelokrug;

e) način izbora i opoziva te mandat članova tijela turističke zajednice;

f) način predstavljanja i zastupanja turističke zajednice;

g) način odlučivanja u turističkoj zajednici;

h) način ostvarivanja javnosti rada;

i) način donošenja statuta i drugih općih akata;

j) imovina te način stjecanja imovine i raspolaganja imovinom;

k) postupanje s imovinom u slučaju prestanka turističke zajednice;

l) druga pitanja značajna za djelovanje turističke zajednice.

(3) Turistička zajednica donosi statut i odluku o izmjenama i dopunama statuta, uz prethodnu saglasnost općinskoga / gradskog vijeća, odnosno Vlade Srednjobosanskog kantona (u daljnjem tekstu: Vlada Kantona).

(4) Statut i izmjene statuta turističke zajednice općine / grada objavljuju se u službenim glasilima općine / grada, a statut i njegove izmjene Turističke zajednice Kantona u „Službenim novinama Srednjobosanskog kantona“.

Član 10

(Tijela turističke zajednice)

(1) Tijela turističke zajednice su:

a) skupština;

b) nadzorni odbor;

c) turističko vijeće.

(2) Članovi tijela turističke zajednice odgovorni su za zakonito i savjesno obavljanje svojih dužnosti.

(3) Mandat članova tijela turističke zajednice traje četiri godine, a članovi mogu biti ponovno birani.

(4) U slučaju prestanka mandata člana tijela turističke zajednice prije isteka vremena na koje je član izabran, novi član se bira ili delegira na vrijeme do isteka mandata na koji je izabran prethodnik.

Član 11.

(Skupština turističke zajednice)

- (1) Skupština turističke zajednice najviše je tijelo upravljanja u turističkoj zajednici.
- (2) Skupštinu turističke zajednice čine članovi, odnosno predstavnici članova turističke zajednice.
- (3) Skupština turističke zajednice:
 - a) donosi statut Turističke zajednice Kantona, uz saglasnost Vlade Kantona, a statut turističke zajednice općine / grada, uz saglasnost općinskog vijeća / gradskog vijeća;
 - b) donosi poslovnik skupštine turističke zajednice;
 - c) bira i razrješuje predsjedavajućeg skupštine turističke zajednice iz reda članova skupštine;
 - d) bira i razrješuje članove turističkog vijeća koje, prema ovom zakonu, bira skupština turističke zajednice;
 - e) bira i razrješuje članove nadzornog odbora turističke zajednice;
 - f) donosi godišnji program rada i godišnji finansijski plan turističke zajednice;
 - g) donosi odluku o osnivanju i organizovanju turističkog ureda;
 - h) prihvata godišnje izvještaje koje podnosi turističko vijeće i nadzorni odbor turističke zajednice;
 - i) donosi odluke i rješava o drugim pitanjima kada je to predviđeno propisima i statutom turističke zajednice.
- (4) Predsjedavajući skupštine turističke zajednice saziva sjednice i predsjedava sjednicama skupštine turističke zajednice a za svoj rad odgovaran je skupštini turističke zajednice.
- (5) Skupština turističke zajednice održava se najmanje dva puta godišnje.

Član 12.

(Nadzorni odbor turističke zajednice)

- (1) Nadzorni odbor turističke zajednice nadzire:
 - a) vođenje poslova turističke zajednice;
 - b) materijalno i finansijsko poslovanje i raspolaganje sredstvima turističke zajednice;
 - c) izvršenje i provedbu programa rada i finansijskoga plana turističke zajednice.
- (2) O obavljenom nadzoru nadzorni odbor turističke zajednice podnosi pisani izvještaj skupštini turističke zajednice.
- (3) Nadzorni odbor turističke zajednice provodi nadzor iz stava (1) ovoga člana najmanje dva puta godišnje.

Član 13.

(Članovi nadzornog odbora turističke zajednice)

- (1) Nadzorni odbor turističke zajednice ima tri člana a čine ga:
 - a) članovi koje imenuje skupština turističke zajednice;
 - b) član kojeg imenuje općinsko / gradsko vijeće, odnosno Vlada Kantona ispred osnivača.
- (2) Član nadzornog odbora ne može biti član turističkog vijeća turističke zajednice.
- (3) Nadzorni odbor turističke zajednice iz reda svojih članova bira predsjedavajućeg nadzornog odbora.
- (4) Nadzorni odbor turističke zajednice donosi svoj poslovnik.

Član 14.

(Turističko vijeće)

- (1) Turističko vijeće je izvršno tijelo skupštine turističke zajednice.
- (2) Turističko vijeće obavlja poslove utvrđene ovim zakonom i statutom turističke zajednice.
- (3) Turističko vijeće je odgovorno skupštini turističke zajednice.
- (4) Turističko vijeće može pravovaljano odlučivati ako je na sjednici prisutno više od polovine članova vijeća.
- (5) Turističko vijeće odlučuje većinom glasova prisutnih članova.
- (6) Turističko vijeće turističke zajednice:
 - a) provodi odluke i zaključke skupštine turističke zajednice;
 - b) predlaže skupštini osnovne smjernice te godišnji program rada i finansijski plan turističke zajednice;
 - c) podnosi izvještaj o izvršenju programa rada i finansijskom poslovanju turističke zajednice;
 - d) upravlja imovinom turističke zajednice u skladu s ovim zakonom i statutom turističke zajednice;
 - e) donosi opće akte za stručnu službu – turistički ured turističke zajednice;
 - f) provodi proceduru izbora direktora turističkog ureda na osnovu javnoga konkursa;
 - g) donosi svoj poslovnik;
 - h) obavlja i druge poslove utvrđene ovim zakonom i statutom turističke zajednice.
- (7) Turističko vijeće ima predsjednika turističkog vijeća koji predstavlja turističku zajednicu.
- (8) Dužnost predsjednika turističkog vijeća turističke zajednice općine / grada obavlja lice koje imenuje općinski načelnik / gradonačelnik uz saglasnost općinskoga / gradskog vijeća.
- (9) Dužnost predsjednika Turističkog vijeća Turističke zajednice Kantona obavlja lice koje imenuje Vlada Kantona.
- (10) Predsjednik turističkog vijeća turističke zajednice saziva sjednice i predsjedava sjednicama turističkog vijeća a za svoj rad odgovaran je osnivaču.

Član 15.

(Turistički ured)

- (1) Turistička zajednica ima stručnu službu.
- (2) Stručnu službu turističke zajednice, kao turistički ured, osniva skupština turističke zajednice.
- (3) Turističko vijeće pravilnikom propisuje posebne uslove u pogledu broja zaposlenika, stručne spreme, radnog iskustva, znanja jezika i drugih posebnih znanja i sposobnosti, koje moraju ispunjavati zaposlenici u turističkom uredu.
- (4) Na pravni status zaposlenika u turističkom uredu, uslove za stupanje na rad i ostala pitanja u vezi s njihovim radom, odgovarajuće se primjenjuju opći propisi o radu ako ovim zakonom nije drugačije propisano.
- (5) U turističkom uredu obavljaju se stručni i administrativni poslovi u vezi sa zadacima turističke zajednice utvrđenim ovim zakonom i statutom turističke zajednice.
- (6) Do donošenja odluke iz stava (2) ovoga člana stručne i administrativne poslove u vezi s potrebama Turističke

zajednice Kantona obavlja postojeća Turistička zajednica Srednjobosanskog kantona, uz nadzor i praćenje Ministarstva.

Član 16.

(Direktor turističkog ureda)

(1) Turistički ured ima direktora koji se imenuje preko javnoga konkursa na period od četiri godine, te može biti ponovno biran.

(2) Direktor turističkog ureda zastupa turističku zajednicu, organizuje rad i rukovodi radom i poslovanjem turističkog ureda, provodi odluke turističkog vijeća i, u granicama utvrđenih ovlaštenja, odgovoran je za poslovanje turističke zajednice i zakonitosti rada turističkog ureda.

(3) Do izbora direktora turističkog ureda turističku zajednicu zastupa predsjednik turističkog vijeća turističke zajednice.

(4) Direktor turističkog ureda i drugi zaposlenici u turističkom uredu ne mogu biti članovi skupštine turističke zajednice, nadzornog odbora turističke zajednice ili turističkog vijeća.

(5) Direktora turističkog ureda turističke zajednice općine / grada, na prijedlog turističkog vijeća, imenuje i razrješuje općinski načelnik / gradonačelnik uz saglasnost općinskoga / gradskog vijeća.

(6) Direktora Turističkog ureda Turističke zajednice Kantona imenuje i razrješuje Vlada Kantona na prijedlog Turističkog vijeća.

(7) Statutom turističke zajednice će se pobliže urediti postupak i kriteriji prijema, imenovanja i razrješenja direktora turističkog ureda.

(8) Općinski načelnik / gradonačelnik, odnosno Vlada Kantona može razriješiti direktora turističkog ureda i prije isteka mandata iz stava (1) ovoga člana:

- a) na lični zahtjev direktora turističkog ureda;
- b) ako zbog izvršavanja ili nemarnog izvršavanja njegove dužnosti turistička zajednica nije mogla obaviti svoje zadatke ili je obavljanje tih zadataka bilo otežano;
- c) ako je zbog nezakonitog, nesavjesnog, nepravilnog rada ili zbog prekoračenja ovlaštenja nastala ili mogla nastati šteta;

d) ako bez opravdanog razloga ne provede ili odbije provesti odluke tijela turističke zajednice ili postupa protivno tim odlukama;

e) ako ne podnese turističkom vijeću izvještaj o svome radu;

f) ako turističko vijeće ne prihvati izvještaj direktora turističkog ureda o radu direktora turističkog ureda;

g) i u drugim slučajevima propisanim statutom.

(9) Prijedlog za pokretanje postupka razrješenja direktora turističkog ureda može podnijeti skupština turističke zajednice ili turističko vijeće, a obavezno ga podnosi u slučajevima iz tačaka b) do g) stava (8) ovoga člana.

(10) Sjedište turističkog ureda je u sjedištu turističke zajednice.

POGLAVLJE II. TURISTIČKA ZAJEDNICA KANTONA

Član 17.

(Osnivanje Turističke zajednice Kantona)

(1) Za područje Kantona osniva se Turistička zajednica Kantona.

(2) Odluku o osnivanju Turističke zajednice Kantona donosi Vlada Kantona.

(3) Pripremne radnje za osnivanje Turističke zajednice Kantona i sazivanje osnivačke skupštine obavlja Ministarstvo.

(4) Sjedište Turističke zajednice Kantona je u Travniku.

Član 18.

(Zadaci Turističke zajednice Kantona)

Osnovni zadaci Turističke zajednice Kantona su sljedeći:

- a) razvijanje i promocija turizma u Kantonu;
- b) objedinjavanje turističke ponude Kantona;
- c) organizovanje i provođenje operativnih istraživanja tržišta za potrebe promocije turizma Kantona;
- d) izrada programa i planova promocije turističkoga proizvoda vodeći računa o specifičnostima svoga turističkog područja, a u skladu sa strategijom razvoja turizma, i marketinškoj strategiji turističkoga proizvoda Kantona;
- e) organizovanje, provođenje i nadziranje svih radnji u vezi s promocijom turističkoga proizvoda Kantona u skladu s osnovnim smjernicama Skupštine Turističke zajednice Kantona, godišnjim programom rada i finansijskim planom Turističke zajednice Kantona;
- f) organizovanje jedinstvenog turističkog informacijskog sistema Kantona u skladu sa sistemom Federacije Bosne i Hercegovine, Bosne i Hercegovine i evropskim standardima;
- g) obavljanje opće i turističke djelatnosti, informativne djelatnosti, prikupljanje i sređivanje svih vrsta turističkih informacija i njihovo stavljanje na raspolaganje javnosti;
- h) poticanje i koordiniranje poticanja svih turističkih zajednica općina, kao i svih privrednih i drugih subjekata u turizmu koji djeluju neposredno i posredno na unapređenje i promociju turizma u Kantonu;
- i) saradnja s nacionalnim turističkim organizacijama drugih zemalja, specijalizovanim međunarodnim regionalnim turističkim organizacijama, te poduzimanje mjera uključivanja u različite multinacionalne i regionalne promotivne turističke projekte i programe;
- j) usklađivanje interesa, pružanje potpore i koordiniranje načina izvršenja svih planskih i programskih zadataka turističkih zajednica općina / gradova;
- k) poduzimanje mjera i aktivnosti za razvoj i promicanje turizma u turistički nerazvijenim dijelovima Kantona;
- l) upravljanje javnom turističkom infrastrukturom koju je Kanton dao na upravljanje;
- m) rad na promociji, plasmanu i podršci realizacije turističkoga proizvoda, kao i pojedinih njegovih dijelova, vrijednosti i usluga, koji čine integralni turistički proizvod;
- n) promocija plansko-projektne, plansko-razvojne i investicijske dokumentacije iz oblasti turizma i njima komplementarnih djelatnosti;

- o) preduzimanje mjera i aktivnosti na kreiranju turističkoga proizvoda i turističkog imidža Kantona, kao i radnje na formiranju marke turističkoga proizvoda destinacije;
- p) organizovanje jedinstvenog turističkog informacijskog sistema, sistema prijavljivanja i objavljivanja turista, kao i statističke obrade prema turističkim zajednicama nižeg nivoa organizovanja;
- q) rad na istraživanju turističkog tržišta s ciljem pozicioniranja turističkoga proizvoda na turističkom tržištu;
- r) praćenje stanja na turističkom tržištu s ciljem pravovremenog donošenja odgovarajućih odluka;
- s) rad na promociji turističke ponude Kantona u zemlji i inostranstvu;
- t) obavljanje informativnih poslova u vezi s turističkom ponudom;
- u) koordiniranje na poslovima razvoja turizma na lokalnom, entitetskom i državnom nivou;
- v) rad na razvoju gostoprimstva, očuvanju prirodnih i kulturnih vrijednosti i unapređenju ekološke zaštite prostora na kojem djeluje turistička zajednica;
- w) obavljanje i drugih poslova kojima se osigurava uspješno djelovanje sistema turističkih zajednica općina i provedba svih postavljenih planova, programa i zadataka.

Član 19.

(Članovi Turističke zajednice Kantona)

- (1) Obavezni članovi Turističke zajednice Kantona su:
 - a) turističke zajednice općina / gradova osnovane na području Kantona;
 - b) ako na području Kantona nisu osnovane turističke zajednice općina / gradova, u pogledu obaveznih članova odgovarajuće se primjenjuju odredbe ovoga zakona koje se odnose na obavezno članstvo u turističkoj zajednici općine / grada.
- (2) Obavezno članstvo u Turističkoj zajednici Kantona počinje danom osnivanja Turističke zajednice Kantona ili danom početka obavljanja djelatnosti pravnog i fizičkog lica na području Kantona.
- (3) Na prestanak obaveznog članstva u Turističkoj zajednici Kantona ne utječe privremena obustava djelatnosti, kao ni sezonsko obavljanje djelatnosti.
- (4) Obavezno članstvo u Turističkoj zajednici Kantona prestaje prestankom rada Turističke zajednice Kantona ili prestankom obavljanja djelatnosti.
- (5) Obavezni članovi Turističke zajednice, odnosno njihovi predstavnici mogu birati i biti birani u tijela Turističke zajednice Kantona.
- (6) Kao dobrovoljni članovi u Turističku zajednicu Kantona mogu se učlaniti pravna i fizička lica koja nisu članovi Turističke zajednice Kantona u skladu sa stavom (2) člana 8. ovoga zakona.

Član 20.

(Skupština Turističke zajednice Kantona)

- (1) Skupštinu Turističke zajednice Kantona čine predstavnici turističkih zajednica općina / gradova, predstavnici Ministarstva, te predstavnici privrednih asocijacija i društava koji se dobrovoljno učlane, na način i pod uslovima utvrđenim statutom.

(2) U slučaju da na nekom području nije osnovana turistička zajednica općine / grada, jednog člana Skupštine Turističke zajednice Kantona delegira općinski načelnik / gradonačelnik općine / grada iz reda obaveznih članova.

(3) Broj predstavnika članova u Skupštini Turističke zajednice Kantona utvrđuje se statutom, tako da je svaka turistička zajednica općine / grada zastupljena najmanje s jednim predstavnikom.

(4) Veći broj predstavnika pojedine turističke zajednice općine / grada zavisi od turističkog značaja područja za koje je osnovana, a određuje se srazmjerno udjelu turističke zajednice u prihodima Turističke zajednice Kantona na način da na svakih 20% učešća u prihodu ima još jednog predstavnika.

(5) Udio u prihodu iz stava (4) ovoga člana utvrđuje se prema prihodu u godini koja prethodi godini u kojoj se provode izbori za Skupštinu Turističke zajednice Kantona.

(6) Osim nadležnosti skupštine iz člana 11. ovoga zakona, Skupština Turističke zajednice Kantona iz redova članova Turističke zajednice bira svoje predstavnike u Skupštinu Turističke zajednice Federacije Bosne i Hercegovine.

Član 21.

(Turističko vijeće Turističke zajednice Kantona)

- (1) Turističko vijeće Turističke zajednice Kantona ima predsjednika i članove Turističkog vijeća.
- (2) Broj članova Turističkog vijeća Turističke zajednice Kantona utvrđuje se statutom.
- (3) Osim nadležnosti turističkog vijeća iz člana 14. ovoga zakona, Turističko vijeće Turističke zajednice Kantona:
 - a) donosi godišnji plan zapošljavanja u Turističkom uredu;
 - b) donosi koncepciju i strategiju marketinga turizma Kantona;
 - c) predlaže smjernice za provedbu programa promocije turizma u turističkim općinama;
 - d) obavlja i druge poslove koje mu povjeri Skupština Turističke zajednice Kantona.
- (4) Turističko vijeće Turističke zajednice Kantona saziva se najmanje svaka dva mjeseca ili kada to zatraži najmanje jedna trećina članova Turističkog vijeća.

Član 22.

(Direktor Turističkog ureda Turističke zajednice Kantona)

- (1) Direktor Turističkog ureda Turističke zajednice Kantona organizuje i vodi rad i poslovanje Turističke zajednice Kantona, zastupa Turističku zajednicu Kantona, te poduzima sve pravne radnje u ime i za račun Turističke zajednice Kantona u svim postupcima pred sudovima, upravnim i drugim organima, kao i pravnim licima s javnim ovlaštenjima.
- (2) Direktor Turističkog ureda odgovoran je za zakonitost rada Turističke zajednice Kantona.
- (3) Direktor Turističkog ureda odgovoran je za svoj rad Turističkom vijeću.
- (4) Statutom Turističke zajednice Kantona utvrđuje se koje odluke donosi direktor Turističkog ureda samostalno, a koje uz saglasnost Turističkog vijeća.

(5) Direktor Turističkog ureda se imenuje na period od četiri godine, javnim konkursom, u skladu sa Zakonom o ministarskim, vladinim i drugim imenovanjima u Federaciji Bosne i Hercegovine („Službene novine Federacije Bosne i Hercegovine“, broj: 12/03, 34/03 i 65/13), i može biti ponovno biran.

(6) Direktor Turističkog ureda treba ispunjavati uslove propisane statutom.

POGLAVLJE III. TURISTIČKA ZAJEDNICA OPĆINE / GRADA

Član 23.

(Odluka o osnivanju turističke zajednice općine / grada)

(1) Odluku o osnivanju turističke zajednice općine / grada donosi općinsko / gradsko vijeće na osnovu prethodne saglasnosti Ministarstva.

(2) Pripremne radnje za osnivanje turističke zajednice općine / grada i sazivanje osnivačke skupštine obavlja nadležna općinska / gradska služba.

(3) Zahtjev za davanje saglasnosti za osnivanje turističke zajednice općine / grada Ministarstvu podnosi općinski načelnik / gradonačelnik.

(4) Ministarstvo je dužno dati saglasnost iz stava (1) ovoga člana nakon što mu podnosilac zahtjeva dostavi elaborat o ekonomskoj opravdanosti i održivosti turističke zajednice.

(5) Sjedište turističke zajednice općine / grada je u mjestu sjedišta općine / grada.

Član 24.

(Zadaci turističke zajednice općine / grada)

(1) Osnovni zadaci turističke zajednice općine / grada su sljedeći:

a) poticanje, unapređivanje i promicanje izvornih vrijednosti (tradicije, običaja, etnološkog blaga i sl.) turističkoga područja kojem pripada općina i stvaranje uslova za njezino privredno korištenje;

b) saradnja i koordinacija s pravnim i fizičkim licima koja su neposredno ili posredno uključena u turistički promet, radi zajedničkog dogovaranja, utvrđivanja i provođenja politike razvoja turizma i njegove promocije u okviru sveobuhvatne politike privrednog razvoja općine ili grada;

c) poticanje, koordinacija i organizovanje kulturnih, umjetničkih, privrednih, sportskih i drugih priredbi koje doprinose obogaćivanju turističke ponude mjesta i općine;

d) poticanje zaštite, održavanja i obnove kulturno-historijskih spomenika i drugih materijalnih dobara od interesa za turizam te njihovo uključivanje u turističku ponudu;

e) poticanje i organizovanje akcija s ciljem očuvanja turističkoga prostora, unapređenje turističkog okruženja i zaštite čovjekova okoliša na području općine;

f) poticanje i pomaganje razvoja turizma i u mjestima na području općine koja nije turistički razvijena;

g) izrada programa i planova promocije u skladu s koncepcijom i smjernicama promocije turizma Kantona;

h) organizovanje, provođenje i nadzor svih radnji na promociji turističkoga proizvoda općine / grada u skladu sa smjernicama skupštine turističke zajednice, godišnjim

programom rada i finansijskim planom turističke zajednice općine / grada;

i) vođenje jedinstvenoga popisa turista za područje općine / grada, naročito radi kontrole naplate boravišne takse i stručne obrade podataka;

j) dnevno prikupljanje te sedmična i mjesečna obrada podataka o turističkom prometu na području turističkih mjesta u općini / gradu i na području turističke zajednice u cjelini, kao i prikupljanje i obrada svih drugih pokazatelja bitnih za praćenje ostvarenja postavljenih ciljeva i zadataka, te njihovo dostavljanje Turističkoj zajednici Kantona;

k) izrada izvještaja o obavljanju zadataka, te analiza i ocjenjivanje ostvarenja programa rada i finansijskoga plana turističke zajednice općine / grada;

l) stvaranje uslova za aktiviranje turističkih resursa na području općine / grada;

m) realizovanje programa aktivnosti boravka studentskih grupa i novinara na području svoga djelovanja;

n) pružanje servisnih usluga i informacija gostima;

o) organizovanje turističko-informativnih biroa;

p) saradnja s općinskim / gradskim organima s ciljem donošenja i provođenja lokalnih mjera za poboljšanje uslova boravka turista na području općine / grada;

q) saradnja s lokalnim udruženjima i nevladinim zajednicama iz oblasti turizma i ugostiteljstva i njima komplementarnim djelatnostima;

r) saradnja s drugim lokalnim turističkim zajednicama u Kantonu, Federaciji Bosne i Hercegovine, Bosni i Hercegovini i inostranstvu;

s) provođenje anketa i drugih istraživanja radi utvrđivanja ocjene kvaliteta turističkoga proizvoda na teritoriji općine / grada;

t) izrada izvještaja i informacija za potrebe Turističke zajednice Kantona;

u) razvijanje turizma kroz implementaciju strateških dokumenata iz oblasti turizma;

v) obavljanje i drugih poslova radi promocije turističkoga proizvoda na području općine / grada.

(2) Turistička zajednica općine / grada učestvuje u provedbi programa i u akcijama Turističke zajednice Kantona koje su zajednički interes za sve subjekte u turizmu s područja Kantona.

Član 25.

(Obavezni članovi turističke zajednice općine / grada)

(1) Obaveznim članom turističke zajednice općine / grada postaje svako pravno i fizičko lice koja na području općine / grada u kojoj se osniva turistička zajednica općine / grada ima svoje sjedište ili podružnicu, pogon, filijalu ili sl. (u daljnjem tekstu: poslovna jedinica), a koja ostvaruje prihod obavljanjem ugostiteljskih i turističkih djelatnosti te s turizmom neposredno povezanih djelatnosti.

(2) Odredbe ovoga zakona primjenjuju se i na podružnice, predstavništva i sl. stranih fizičkih i pravnih lica koja imaju sjedište u turističkom mjestu.

(3) Djelatnosti iz stava (1) ovoga člana utvrdit će ministar pravilnikom, uz saglasnost Vlade Kantona, u skladu

sa standardnom klasifikacijom djelatnosti u Bosni i Hercegovini.

(4) Obavezno članstvo u turističkoj zajednici općine / grada počinje danom osnivanja turističke zajednice općine / grada ili danom početka obavljanja djelatnosti pravnog i fizičkog lica na području općine / grada na kojem je osnovana turistička zajednica.

(5) Na prestanak obaveznog članstva u turističkoj zajednici ne utječe privremena obustava djelatnosti, kao ni sezonsko obavljanje djelatnosti.

(6) Obavezno članstvo u turističkoj zajednici općine / grada prestaje prestankom postojanja turističke zajednice ili prestankom obavljanja djelatnosti člana turističke zajednice.

(7) Obavezni članovi turističke zajednice općine / grada, odnosno njihovi predstavnici mogu birati i biti birani u tijela turističke zajednice općine / grada.

Član 26.

(Dobrovoljni član turističke zajednice općine / grada)

(1) Kao dobrovoljni član u turističku zajednicu općine / grada može se učlaniti pravno i fizičko lice koje nije član turističke zajednice u skladu sa stavom (1) člana 25. ovoga zakona.

(2) O zahtjevu lica iz stava (1) ovoga člana odlučuje skupština turističke zajednice.

(3) Dobrovoljni član turističke zajednice općine / grada ima ista prava i obaveze kao i obavezni član.

Član 27.

(Skupština turističke zajednice općine / grada)

(1) Skupštinu turističke zajednice općine / grada čine pravna i fizička lica članovi turističke zajednice općine / grada.

(2) Ako zbog mnogobrojnosti nema mogućnosti da svaki član turističke zajednice bude predstavljen u skupštini turističke zajednice općine / grada, skupštinu čine predstavnici članova, tako da svaki predstavnik u skupštini predstavlja određeni broj članova iz odgovarajuće djelatnosti u općini / gradu, u skladu sa statutom.

(3) Broj predstavnika članova skupštine iz stava (2) ovoga člana utvrđuje se statutom turističke zajednice općine / grada srazmjerno visini udjela odgovarajuće djelatnosti u prihodu turističke zajednice, s tim da jedna djelatnost može imati maksimalno 35% predstavnika u skupštini.

(4) Kao udio u prihodu turističke zajednice iz stava (3) ovoga člana računaju se članski doprinos i boravišna taksa koje su fizička i pravna lica iz određene djelatnosti uplatila u korist turističke zajednice općine / grada u godini koja prethodi godini u kojoj se provode izbori za skupštinu turističke zajednice općine / grada.

(5) Ako tokom mandata dođe do promjene udjela u приходима za više od 10%, broj predstavnika članova skupštine iz stava (2) ovoga člana iznova će se utvrditi prema stavu (3) ovoga člana.

(6) Promjenu iz stava (5) ovoga člana utvrđuje skupština turističke zajednice općine / grada istovremeno sa usvajanjem godišnjega finansijskog izvještaja.

(7) Osim nadležnosti skupštine iz člana 11. ovoga zakona, skupština turističke zajednice općine / grada:

a) bira predstavnike u Skupštinu Turističke zajednice Kantona iz reda svojih članova;

b) donosi odluku o osnivanju turističko-informativnih biroa.

Član 28.

(Turističko vijeće turističke zajednice općine / grada)

(1) Turističko vijeće turističke zajednice općine / grada čine predsjednik i članovi koje bira skupština turističke zajednice općine / grada iz reda članova turističke zajednice, na način da se osigura srazmjerna zastupljenost članova pojedinih djelatnosti u turističkom vijeću prema njihovu učešću u ukupnom prihodu turističke zajednice, i predstavnik nadležnog organa lokalne samouprave.

(2) Broj članova turističkog vijeća turističke zajednice općine / grada utvrđuje se statutom.

Član 29.

(Direktor turističkog ureda turističke zajednice općine / grada)

(1) Direktor turističkog ureda turističke zajednice općine / grada organizuje i vodi rad i poslovanje turističke zajednice općine / grada, zastupa turističku zajednicu općine / grada i poduzima sve pravne radnje u ime i za račun turističke zajednice općine / grada u svim postupcima pred sudovima, upravnim i drugim tijelima te pravnim licima s javnim ovlaštenjima.

(2) Direktor turističkog ureda odgovoran je za zakonitost rada turističke zajednice općine / grada.

(3) Direktor turističkog ureda odgovara za svoj rad turističkom vijeću općine / grada.

(4) Statutom turističke zajednice općine / grada utvrđuje se koje odluke donosi direktor turističkog ureda samostalno, a koje uz saglasnost turističkog vijeća.

(5) Direktor turističkog ureda se imenuje na period od četiri godine, javnim konkursom, u skladu sa Zakonom o ministarskim, vladinim i drugim imenovanjima u Federaciji Bosne i Hercegovine, i može biti ponovno biran.

(6) Direktor turističkog ureda treba ispunjavati uslove propisane statutom.

POGLAVLJE IV. KATEGORIZACIJA TURISTIČKIH MJESTA

Član 30.

(Kategorizacija turističkog mjesta)

(1) Osnov ukupnog sistema turističkih zajednica definisanog ovim zakonom čine općine / gradovi koje se, shodno svom značaju za turizam, razvrstavaju u kategorije turističkih mjesta.

(2) Osnovni kriteriji za kategorizaciju turističkih mjesta su:

a) trogodišnji prosjek ostvarenoga broja turističkih noćenja u turističkom mjestu (broj noćenja);

b) broj noćenja iz tačke a) ovoga stava po stanovniku turističkog mjesta (koeficijent intenziteta turističkoga prometa);

c) ukupna vrijednost prometa u turističkoj i ugostiteljskoj djelatnosti po stanovniku mjesta (koeficijent specifičnoga turističkog prometa).

(3) Shodno kriterijima iz stava (2) ovoga člana, turistička mjesta se razvrstavaju u A, B, C i D kategorije.

(4) Bliže kriterije kategorizacije turističkih mjesta, način vrednovanja kriterija za kategorizaciju turističkih mjesta i način određivanja kategorije turističkih mjesta na području Kantona propisuje ministar uz prethodnu saglasnost Vlade Kantona.

Član 31.

(Komisija)

(1) Ministar, rješenjem, imenuje komisiju za proglašenje kategorije turističkog mjesta.

(2) Na prijedlog komisije iz stava (1) ovoga člana, ministar donosi rješenje o proglašenju i kategorizaciji područja jedinice lokalne samouprave kao turističkog mjesta.

(3) Rješenje iz stava (2) ovoga člana podliježe reviziji nakon isteka roka od pet godina od dana njegove dostave.

POGLAVLJE V. FINANSIRANJE TURISTIČKIH ZAJEDNICA

Član 32.

(Prihodi)

(1) Turističke zajednice finansiraju se iz izvora kako slijedi:

- a) boravišna taksa;
- b) članski doprinos;
- c) grantovi budžeta općine / grada, odnosno Kantona na osnovu posebnih programa / projekata;
- d) zajmovi;
- e) dobrovoljni prilozi;
- f) imovina u vlasništvu;
- g) prihodi od obavljanja privrednih djelatnosti iz stava (2) člana 5. ovoga zakona.

(2) Osim izvora finansiranja navedenih u stavu (1) ovoga člana, poslovanje ili pojedine aktivnosti turističke zajednice mogu se finansirati i dodatnim sredstvima koja osiguravaju njihovi članovi i druge zainteresovane organizacije.

(3) Na osnovu posebne odluke turističkog vijeća, turistička zajednica se može finansijski zaduživati radi realizacije programa rada i finansijskoga plana, ali ukupna vrijednost zaduženja ne smije prelaziti 25% prihoda predviđenih finansijskim planom.

Član 33.

(Obveznici plaćanja boravišne takse)

(1) Boravišna taksa je paušalni novčani iznos koji plaća lice koje izvan svoga prebivališta koristi usluge smještaja u smještajnom objektu u kojem se obavlja turistička ili ugostiteljska djelatnost (u daljnjem tekstu: smještajni objekt).

(2) Smještajnim objektom, u smislu stava (1) ovoga člana, smatra se: hotel, motel, hostel, pansion, turistički apartman, odmaralište, kamp, bungalov, planinarski dom, soba za iznajmljivanje i svi drugi objekti u kojima se pružaju usluge smještaja.

(3) Lica iz stava (1) ovoga člana boravišnu taksu plaćaju pravnom ili fizičkom licu s kojim su ugovorile pružanje usluga smještaja. Izuzetno od stava (1) ovoga člana, lica koja pružaju ugostiteljske usluge smještaja u domaćinstvu (lica u domaćinstvu) plaćaju godišnji paušalni iznos boravišne takse za svaki krevet i smještajnu jedinicu koji se koriste za pružanje usluge smještaja u skladu s propisima o pružanju usluge smještaja. Na dodatne (pomoćne) krevete ne plaća se godišnji paušalni iznos boravišne takse.

(4) Dnevnu boravišnu taksu plaća organizator grupnoga putovanja – agencija, za svaki grupni dolazak turista u turističko mjesto, bez noćenja.

(5) Boravišnu taksu i dnevnu boravišnu taksu pod jednakim uslovima plaćaju domaći i strani državljani.

Član 34.

(Oslobađanja od obaveze plaćanja boravišne takse)

- (1) Boravišnu taksu ne plaćaju:
- a) djeca do dobi od 12 godina;
 - b) lica s teškim čulnim i tjelesnim smetnjama (slijepi, gluhi, distrofičari);
 - c) lica koja na banjsko i klimatsko liječenje, odnosno specijalizovanu rehabilitaciju uputi nadležna liječnička komisija;
 - d) lica koje obavlja sezonske poslove s prijavljenim boravkom u turističkom mjestu;
 - e) lica koje neprekidno boravi u objektu za smještaj dulje od 30 dana;
 - f) učesnici školskih ekskurzija, odnosno učenici i studenti čiji boravak organizuju škole i fakulteti u okviru redovnih programa, te održavanja sportskih i kulturnih manifestacija;
 - g) strani državljani koji je, prema međunarodnim konvencijama i sporazumima, oslobođen plaćanja taksi;
 - h) strani državljani koji organizovano, preko zvanične humanitarne organizacije, dolazi radi pružanja humanitarne pomoći.

(2) Lica iz stava (1) ovoga člana ne plaćaju boravišnu taksu ako podnesu dokaz o ispunjavanju uslova utvrđenih u tom stavu (člansku kartu, potvrdu škole, liječnika, liječničku uputnicu i dr.).

(3) Boravišnu taksu umanjenu za 50% plaćaju lica u dobi od 12 do 18 godina.

(4) Dnevnu boravišnu taksu ne plaćaju:

- a) djeca u dobi do 12 godina;
- b) lica s teškim čulnim i tjelesnim smetnjama (slijepi, gluhi, distrofičari);

c) učesnici školskih ekskurzija, odnosno učenici i studenti čiji boravak organizuju škole i fakulteti u okviru redovnoga programa, te održavanja sportskih i kulturnih manifestacija;

d) strani državljani koji je, prema međunarodnim konvencijama i sporazumima, oslobođen plaćanja taksi;

e) strani državljani koji organizovano, preko zvaničnih humanitarnih organizacija, dolazi radi pružanja humanitarne pomoći.

Član 35.

(Visina i način naplate boravišne takse)

- (1) Visinu boravišne takse i godišnji paušalni iznos, na prijedlog Ministarstva, utvrđuje Vlada Kantona najkasnije do kraja oktobra tekuće godine za narednu godinu.
- (2) Boravišnu taksu naplaćuje pravno i fizičko lice koje pruža usluge smještaja (u daljnjem tekstu: davalac usluga).
- (3) Davalac usluga naplaćuje boravišnu taksu istovremeno s naplatom usluge smještaja.
- (4) Ako davalac usluga ne naplati boravišnu taksu, dužan je na svoj teret uplatiti iznos nenaplaćene boravišne takse.
- (5) Dnevna boravišna taksa iz stava (4) člana 33. ovoga zakona iznosi 50% boravišne takse.

Član 36.

(Evidencija boravišne takse)

- (1) Davalac usluga je dužan, uz račun za usluge smještaja, posebno iskazati iznos boravišne takse te, u slučajevima iz stavova (1) i (3) člana 34. ovoga zakona, navesti osnov oslobađanja od plaćanja boravišne takse, odnosno osnov za plaćanje umanjene takse.
- (2) Davalac usluga vodi evidenciju o uplaćenju taksi u knjizi, odnosno u drugoj odgovarajućoj evidenciji.
- (3) Davalac usluga je dužan da nadležnom ministarstvu, Turističkoj zajednici Kantona, odnosno turističkoj zajednici općine / grada, do 15. u mjesecu za prethodni mjesec dostavi izvještaj o broju korisnika usluga smještaja i iznosu naplaćene boravišne takse, na obrascu koji će propisati ministar.

Član 37.

(Prijava i odjava turista)

- (1) Davalac usluga koji pruža usluge smještaja u smještajnim objektima iz stavova (1) i (2) člana 33. ovoga zakona dužan je u roku od 24 sati od dolaska prijaviti i od odlaska odjaviti nadležnoj turističkoj zajednici sva lica kojima se pruža usluga noćenja u smještajnom objektu.
- (2) Oblik i sadržaj obrasca prijave boravka građana koji se koriste uslugama noćenja u smještajnim objektima te sadržaj i način vođenja evidencije o boravku građana u smještajnim objektima propisat će ministar.

Član 38.

(Način korištenja**i raspoređivanja sredstava boravišne takse)**

- (1) Sredstva prikupljena na osnovu boravišne takse i dnevne boravišne takse isključivo se koriste za razvoj i unapređenje turističke ponude jedinice lokalne samouprave i Kantona.
- (2) Sredstva od naplaćene boravišne takse za proteklu sedmicu davalac usluga dužan je uplatiti na račun Turističke zajednice Kantona prvog radnog dana naredne sedmice.
- (3) Turistička zajednica Kantona dužna je 70% naplaćenih sredstava od boravišne takse vratiti na račun općine / grada u roku od sedam dana od dana kada je uplatio davalac usluga.
- (4) Ako nije osnovana turistička zajednica na nivou općine / grada, sredstva prikupljena na osnovu boravišne takse predstavljaju prihod turističke zajednice Kantona, s tim da se

40% uplaćenih sredstava usmjeri na unapređenje turizma općina / gradova iz kojih je uplaćena boravišna taksa.

(5) Sredstva iz stava (1) ovoga člana koristit će se na osnovu usvojenoga programa rada i finansijskoga plana.

Član 39.

(Obveznici plaćanja članskoga doprinosa)

- (1) Članski doprinos turističkoj zajednici dužni su plaćati obavezni članovi turističke zajednice iz člana 25. ovoga zakona.
- (2) Dobrovoljni članovi turističke zajednice općine plaćaju članski doprinos turističkoj zajednici u visini koju utvrdi skupština turističke zajednice.

Član 40.

(Visina članskoga doprinosa)

- (1) Visina članskoga doprinosa koji plaća pravno i fizičko lice kao obavezni član Turističke zajednice Kantona ili općine / grada zavisi:
 - a) od kategorije turističkog mjesta u kojem je sjedište ili organizacijska jedinica;
 - b) od pravnog statusa obveznika (pravno ili fizičko lice);
 - c) od stope na ukupni prihod utvrđene ovim zakonom.
- (2) Zavisno od kategorije turističkog mjesta, obveznici plaćanja plaćaju članski doprinos u postocima kako slijedi:

Kategorija turističkog mjesta	A	B	C	D
Pravno lice	0,05	0,04	0,03	0,02
Fizičko lice	0,025	0,02	0,015	0,01

Član 41.

(Osnovica za obračun članskoga doprinosa)

- (1) Osnovica za obračun članskoga doprinosa za pravno lice iz stava (1) člana 40. ovoga zakona koje je obveznik plaćanja poreza na dobit jest ukupni prihod koji čine svi prihodi koje je to lice dužno iskazati u računu dobiti i gubitaka, u skladu s propisima o računovodstvu.
- (2) Osnovica za obračun članskoga doprinosa za fizičko lice iz stava (1) člana 40. ovoga zakona koje je obveznik plaćanja poreza na dohodak jesu ukupni primici iz knjige primitaka i izdataka, u skladu s propisima o porezu na dohodak, umanjeni za naplaćeni porez na dodatnu vrijednost.
- (3) Za svaki organizacijski oblik izvan sjedišta pravnog i fizičkog lica utvrđuje se posebna osnovica i ukupni prihod za obračun članskoga doprinosa.
- (4) Pravnom i fizičkom licu smanjuje se osnovica za obračun članskoga doprinosa za dio njegova ukupnoga prihoda ostvarenog u organizacijskim jedinicama koje se nalaze izvan turističkog mjesta u kojem je sjedište pravnog i fizičkog lica.

Član 42.

(Način plaćanja članskoga doprinosa)

- (1) Pravno lice plaća članski doprinos koji predstavlja zajednički prihod turističke zajednice Kantona i turističke zajednice općine / grada u kojoj ima registrovano sjedište.

(2) Pravno lice koje ima bilo kakvu organizacijsku jedinicu izvan registrovanog sjedišta plaća dio članskoga doprinosa Kantonu, općinama / gradovima u kojima organizacijske jedinice obavljaju djelatnost, srazmjerno učešću organizacijske jedinice u ukupnom prometu pravnoga lica.

(3) Fizičko lice plaća članski doprinos prema sjedištu nadležnog organa koji je izdao odobrenje za obavljanje djelatnosti.

(4) Obveznici plaćanja članskoga doprinosa dužni su do 15. u mjesecu obračunati članski doprinos za prethodni mjesec i uplatiti ga na račun Turističke zajednice Kantona.

(5) Uz uplatu članskoga doprinosa obveznici su dužni dostaviti obrazac obračuna iz kojeg je jasno vidljivo kojoj općini / gradu pripada obračunati i uplaćeni članski doprinos.

(6) Izgled i sadržaj obrasca iz stava (5) ovoga člana propisat će ministar.

Član 43.

(Raspoređivanje članskoga doprinosa)

(1) Sredstva prikupljena na osnovu članskoga doprinosa raspoređuju se na način kako slijedi:

a) 70% sredstava pripada turističkoj zajednici općine / grada ako je osnovana;

b) 30% sredstava pripada Turističkoj zajednici Kantona.

(2) Turistička zajednica Kantona u roku od pet dana od dana uplate raspoređuje sredstva prikupljena na osnovu članskoga doprinosa shodno odredbama stava (1) ovoga člana.

(3) Ako nije osnovana turistička zajednica na nivou općine / grada, sredstva prikupljena na osnovu članskoga doprinosa predstavljaju prihod Turističke zajednice Kantona, s tim da se 40% uplaćenih sredstava usmjeri na unapređenje turizma za općine / gradove iz kojih je uplaćen članski doprinos.

Član 44.

(Ostali prihodi)

Prihodi koje ostvari turistička zajednica u skladu s tačkom g) stava (1) i stavom (2) člana 32. ovoga zakona pripadaju u punom iznosu turističkoj zajednici koja je ostvarila navedene prihode.

POGLAVLJE VI. PRIVREĐIVANJE U TURISTIČKOJ ZAJEDNICI

Član 45.

(Godišnji program rada i finansijski plan)

(1) Za svaku poslovnu godinu turistička zajednica utvrđuju program rada i finansijski plan.

(2) Prijedlog programa rada i prijedlog finansijskoga plana za sljedeću poslovnu godinu podnosi turističko vijeće skupštini turističke zajednice do kraja novembra tekuće godine.

(3) Skupština turističke zajednice dužna je do kraja tekuće godine donijeti program rada i finansijski plan za narednu godinu.

(4) Godišnji program rada i finansijski plana za sljedeću poslovnu godinu turistička zajednica općine / grada dužna je

dostaviti Turističkoj zajednici Kantona odmah nakon usvajanja.

(5) Skupština Turističke zajednice Kantona donosi godišnji program rada i finansijski plan uz prethodnu saglasnost Vlade Kantona, a turistička zajednice općine / grada uz prethodnu saglasnost načelnika / gradonačelnika.

Član 46.

(Sadržaj programa rada i finansijskoga plana)

(1) Godišnji program rada i godišnji finansijski plan turističke zajednice obavezno sadrže pojedinačno utvrđene planirane zadatke i potrebna sredstva za njihovo izvršenje.

(2) Prijedlog programa rada i finansijskoga plana iz stava (1) ovoga člana obavezno se dostavljaju na razmatranje članovima skupštine turističke zajednice osam dana prije održavanja sjednice na kojoj se ti akti donose.

Član 47.

(Izmjene i dopune programa rada i finansijskoga plana)

(1) Tokom godine turistička zajednica može mijenjati i dopunjavati svoj program rada i godišnji finansijski plan.

(2) Ako tokom godine dođe do odstupanja od utvrđenoga programa rada i finansijskoga plana, turistička zajednica je dužna donijeti izmjene, odnosno dopune programa rada i finansijskoga plana.

(3) Izmjene programa rada i finansijskoga plana iz stavova (1) i (2) ovoga člana obavljaju se na način i prema postupku kojim se donosi program rada i finansijski plan.

Član 48.

(Godišnji finansijski izvještaj)

(1) Prijedlog godišnjega finansijskog izvještaja za prethodnu godinu turističko vijeće podnosi skupštini turističke zajednice do 15. marta tekuće godine.

(2) Prijedlog godišnjega finansijskog izvještaja mora se staviti na uvid članovima turističke zajednice osam dana prije razmatranja na skupštini turističke zajednice.

(3) Godišnji finansijski izvještaj turističke zajednice općine / grada dostavlja se Turističkoj zajednici Kantona.

(4) Skupština turističke zajednice dužna je do kraja marta tekuće godine usvojiti godišnji finansijski izvještaj za prethodnu godinu.

(5) Godišnji finansijski izvještaj za prethodnu godinu turistička zajednica općine / grada dužna je dostaviti općinskom / gradskom vijeću, preko općinskoga načelnika / gradonačelnika, na prihvatanje, i Turističkoj zajednici Kantona. Turistička zajednica Kantona dužna je svoj izvještaj, preko Ministarstva, dostaviti Vladi Kantona i Skupštini Kantona na prihvatanje, do kraja aprila tekuće godine.

(6) Godišnji finansijski izvještaj obavezno sadrži podatke o izvršenju programa rada pojedinačno utvrđenih zadataka, o izdacima za njihovo izvršenje, o izdacima za poslovanje turističkog ureda i rad organa turističke zajednice, o ostvarenju prihoda, po izvorima, o finansijskom rezultatu poslovanja, zatim usporedbu finansijskoga plana i njegova ostvarenja, s obrazloženjem odstupanja, kao i analizu i ocjenu izvršenja programa, te procjenu učinka poduzetih aktivnosti za razvoj turizma, kao i nalaz ovlaštene revizorske kuće.

POGLAVLJE VII. NADZOR**Član 49.****(Nadzor od Ministarstva)**

(1) Ministarstvo provodi nadzor nad provođenjem odredbi ovoga zakona te drugih propisa kojima se uređuje organizovanje i poslovanje turističkih zajednica na području Kantona.

(2) Ministarstvo može naložiti Turističkoj zajednici Kantona provođenje nadzora nad turističkim zajednicama općina / gradova, uz obavezno dostavljanje izvještaja odmah nakon obavljenog nadzora.

(3) U provedbi nadzora Ministarstvo posebno nadzire:

- a) zakonitost organizovanja, rada i postupanja organa turističke zajednice;
- b) zakonitost akata turističke zajednice;
- c) izvršavanje zadataka turističke zajednice i namjensko trošenje sredstava;
- d) zakonitosti rada i postupanja zaposlenika turističkog ureda turističke zajednice.

Član 50.**(Provedba nadzora)**

(1) U provedbi nadzora Ministarstvo može zahtijevati izvještaje, podatke, materijale i druge obavijesti od turističkih zajednica.

(2) Turističke zajednice dužne su omogućiti Ministarstvu provedbu nadzora, te mu dostaviti ili pripremiti tačne i potpune izvještaje, podatke i druge materijale i obavijesti iz stava (1) ovoga člana.

Član 51.**(Mjere za otklanjanje uočenih nepravilnosti)**

Ako u provedbi nadzora Ministarstvo utvrdi da postoje nezakonitosti ili nepravilnosti, poduzet će mjere u svrhu otklanjanja uočenih nezakonitosti ili nepravilnosti, na način kako slijedi:

- a) naložiti mjere koje se moraju poduzeti radi otklanjanja utvrđenih nezakonitosti ili nepravilnosti i odrediti za to primjeren rok;
- b) naložiti pokretanje postupka za utvrđivanje odgovornosti voditelja i odgovornog zaposlenika turističkog ureda.

Član 52.**(Raspuštanje skupštine turističke zajednice)**

(1) Osnivač može donijeti odluku o raspuštanju skupštine turističke zajednice:

- a) ako donosi opće akte suprotno zakonu, statutu ili drugom propisu, ili zbog povreda zakona i drugih propisa;
- b) ako ne izabere članove turističkog vijeća u roku od 60 dana od dana konstituisanja, isteka njihova mandata ili njihova razrješenja, odnosno od dana podnošenja ostavke;
- c) ako ne donese godišnji program rada i finansijski plan, odnosno godišnji finansijski izvještaj u zakonski utvrđenom roku;
- d) ako turistička zajednica ne ispunjava zadatke zbog kojih je osnovana.

(2) Protiv odluke iz stava (1) ovoga člana može se pokrenuti upravni spor.

Član 53.**(Komisija)**

(1) Ako se raspusti skupština turističke zajednice, općinski načelnik / gradonačelnik, uz saglasnost općinskoga / gradskog vijeća, odnosno Ministarstvo, uz saglasnost Vlade Kantona, rješenjem će imenovati članove komisije u turističkoj zajednici.

(2) Komisija osigurava djelovanje turističke zajednice i izvršavanje zakonom utvrđenih zadataka turističke zajednice do ustrojavanja novih organa turističke zajednice te osigurava otklanjanje razloga zbog kojih je došlo do raspuštanja skupštine.

(3) Danom dostave rješenja o imenovanju članova komisije turističkoj zajednici, prestaju s radom svi organi turističke zajednice, a njihova ovlaštenja preuzima komisija.

(4) Komisija može donositi ili mijenjati akte turističke zajednice samo ako je to potrebno radi provedbe zakona ili drugog propisa ili usklađivanja sa zakonom ili drugim propisima.

(5) Komisija ne može donositi ili mijenjati program rada ili finansijski plan i ne može raspolagati imovinom turističke zajednice, osim izvršenja isplate tekućih izdataka te radi izvršenja ranije preuzetih obaveza ili dovršenja ranije započetih poslova.

(6) Komisija je obavezna osigurati konstituisanje nove skupštine u roku od 60 dana od dana raspuštanja skupštine.

(7) Protiv rješenja iz stava (1) ovoga člana može se pokrenuti upravni spor.

Član 54.**(Inspeksijski nadzor)**

(1) Inspeksijski nadzor u provođenju ovoga zakona i propisa donesenih na osnovu ovoga zakona te pojedinačnih akata, uslova i načina rada nadziranih pravnih i fizičkih lica, turističkih zajednica, provodi kantonalna Turističko-ugostiteljska inspekcija i druge inspekcije u okviru svoje nadležnosti.

(2) Inspeksijski nadzor treba biti obavljen tako da ne ometa redovno obavljanje rada i poslovanja.

**POGLAVLJE VIII. PRESTANAK POSTOJANJA
TURISTIČKE ZAJEDNICE****Član 55.****(Razlozi prestanka postojanja turističke zajednice)**

- (1) Turistička zajednica prestaje postojati na osnovu:
- a) odluke skupštine, uz saglasnost osnivača, o prestanku postojanja turističke zajednice;
 - b) odluke osnivača o zabrani djelovanja turističke zajednice.
- (2) Odluku iz tačke (b) stava (1) ovoga člana, osnivač donosi iz razloga kako slijedi:
- a) ako turistička zajednica donosi opće akte suprotno zakonu, statutu ili drugom propisu, ili zbog povrede zakona i drugih propisa;

- b) ako se u turističkoj zajednici ne održe izbori za novu skupštinu, u skladu sa zakonom i statutom;
 - c) ako se ni u roku od 60 dana od dana provedenih izbora ne konstituiše skupština turističke zajednice;
 - d) ako ne provede mjere koje je naložio osnivač.
- (3) Protiv odluke iz stava (2) ovoga člana može se pokrenuti upravni spor.

Član 56.

(Okončanje djelovanja i raspolaganje imovinom u slučaju prestanka postojanja turističke zajednice)

- (1) U slučaju prestanka postojanja turističke zajednice općine / grada, općina / grad je dužan okončati poslove turističke zajednice općine / grada koji su u toku.
- (2) U slučaju prestanka turističke zajednice općine / grada, imovinu preostalu nakon namirenja povjerilaca stječe općina / grad.
- (3) U slučaju prestanka postojanja Turističke zajednice Kantona, Ministarstvo je dužno okončati poslove Turističke zajednice Kantona koji su u toku, a pravo raspolaganja imovinom koja preostane stječe Vlada Kantona.

Član 57.

(Brisanje iz Upisnika)

- (1) Na osnovu odluke skupštine, odnosno pravosnažnog rješenja o zabrani djelovanja turističke zajednice, Ministarstvo će brisati turističku zajednicu iz Upisnika.
- (2) Brisanjem iz Upisnika i sudskog registra turistička zajednica prestaje postojati.

POGLAVLJE IX. KAZNENE ODREDBE

Član 58.

- (1) Novčanom kaznom u iznosu od 2.000,00 KM do 5.000,00 KM kaznit će se za prekršaj turistička zajednica:
- a) ako započne obavljati djelatnost prije nego što je upisana u sudski registar [stav (2) člana 3. ovoga zakona];
 - b) ako ne prijavi promjenu upisanih podataka [stav (3) člana 3. ovoga zakona];
 - c) ako donese statut i / ili izmjene i dopune statuta bez prethodne saglasnosti [stav (3) člana 9. ovoga zakona];
 - d) ako ne objavi statut ili njegove izmjene i dopune [stav (4) člana 9. ovoga zakona];
 - e) ako ne ostvaruje zakonom utvrđene zadatke (članovi 18. i 24. ovoga zakona);
 - f) ako ne donese godišnji program rada i finansijski plan na propisan način [stav (5) člana 45. ovoga zakona];
 - g) ako ne donese godišnji finansijski izvještaj na propisan način (član 48. ovoga zakona);
 - h) ako ne omogući Ministarstvu provedbu nadzora ili mu ne dostavi ili ne pripremi tačne i potpune izvještaje, podatke i druge materijale i obavijesti [stav (2) člana 50. ovoga zakona];
 - i) ako ne otkloni nepravilnosti i nezakonitosti utvrđene nadzorom (član 51. ovoga zakona).
- (2) Za prekršaje iz stava (1) ovoga člana kaznit će se novčanom kaznom u iznosu od 500,00 KM do 2.500,00 KM i odgovorno lice u turističkoj zajednici.

Član 59.

- (1) Novčanom kaznom u iznosu od 3.000,00 KM do 10.000,00 KM kaznit će se za prekršaj pravno lice koje pruža usluge smještaja:
- a) ako ne naplati boravišnu taksu istovremeno s naplatom usluge [stav (3) člana 35. ovoga zakona];
 - b) ako u računu posebno ne iskaže iznos boravišne takse ili ne navede osnov oslobađanja od plaćanja takse [stav (1) člana 36. ovoga zakona];
 - c) ako ne vodi ili netačno vodi evidenciju o uplaćenju taksi u knjizi, odnosno u drugoj odgovarajućoj evidenciji [stav (2) člana 36. ovoga zakona];
 - d) ako u propisanom roku ne podnese nadležnom organu izvještaj o broju korisnika usluge smještaja i iznosu naplaćene boravišne takse [stav (3) člana 36. ovoga zakona];
 - e) ako ne prijavi i odjavi turistu na propisani način [stav (1) člana 37. ovoga zakona];
 - f) ako sredstva od naplaćene boravišne takse ne uplati u propisanom roku [stav (2) člana 38. ovoga zakona].
- (2) Za prekršaj iz stava (1) ovoga člana kaznit će se odgovorno lice u pravnom licu novčanom kaznom u iznosu od 2.000,00 KM do 5.000,00 KM.
- (3) Za prekršaj iz stava (1) ovoga člana kaznit će se fizičko lice koje pruža usluge smještaja novčanom kaznom u iznosu od 500,00 KM do 2.500,00 KM.

Član 60.

- (1) Novčanom kaznom u iznosu od 2.000,00 KM do 10.000,00 KM kaznit će se za prekršaj pravno lice obveznik plaćanja članskoga doprinosa:
- a) ako ne obračuna i u propisanom roku ne uplati članski doprinos [stav (4) člana 42. ovoga zakona];
 - b) ako uz uplatu članskoga doprinosa (članarine) ne dostavi obrazac obračuna iz kojeg je jasno vidljivo kojoj općini / gradu pripada obračunati i uplaćeni članski doprinos [stav (5) člana 42. ovoga zakona].
- (2) Za prekršaj iz stava (1) ovoga člana kazniti će se odgovorno lice u pravnom licu novčanom kaznom u iznosu od 2.000,00 KM do 5.000,00 KM.
- (3) Za prekršaj iz stava (1) ovoga člana kazniti će se fizičko lice novčanom kaznom u iznosu od 500,00 KM do 2.500,00 KM.

POGLAVLJE X. PRIJELAZNE I ZAVRŠNE ODREDBE

Član 61.

Danom upisa u sudski registar Turističke zajednice Kantona prestaje s radom dosadašnja Turistička zajednica Srednjobosanskog kantona.

Član 62.

- (1) Upisom u sudski registar Turistička zajednica Kantona preuzima prostor za rad, imovinu, arhivu, predmete, akte i drugu dokumentaciju te sredstva za rad dosadašnje Turističke zajednice Srednjobosanskog kantona, kao i novčana sredstva utvrđena bilansom na dan upisa u sudski registar.
- (2) Turistička zajednica Kantona preuzima zaposlenike dosadašnje Turističke zajednice Srednjobosanskog kantona u

